

Remitido

E BERDAD TRAS DI E COMISION PRO ARUBA ENTERTAINMENT CENTER

Hopi ta ser comenta rond di e decision tuma door di Fundacion Lotto pa Deporte y apoyapa Ministro di Deporte, hubentud y cultura, pa no sigui cu operacion di Aruba Entertainment Center den su forma actual pa motibonan ya conoci.

Laga mi haci un analisis di Aruba Entertainment Center.

Con Aruba Entertainment Center a bin den existencia?

Sigur den ningun momento e tabata forma parti di e compleho deportivo si no te na ultimo ya cu ta den su fase final esaki a keda participa na pueblo ta pa e motibo ey tambe cu no tabata tin un publicacion pa Hinderverordering.

Pues na ningun momento tabata e intencion pa tin un Aruba Entertainment Center.

Ora cu Aruba Entertainment Center a bira realidad no tabata tin un destaho publico pa mira ken ta bay opera e lugar pero mas bien e Ministro di Deporte anterior a dicidi di duna tres "Brother" di dije pa opera e lugar.

Mientras e tres "Brotherman" aki no a inverti ni un cent den e lugar.

Aki pueblo, deportista y hubentud a perde pa prome biaha.

Pueblo, deportistanan y hubentud a perde di dos biaha ora cu e Ministro di Deporte anterior a dicidi sin mas di duna permiso pa trece grupo di exterior na e "Brotherman" cual permiso ta encera tres di e cuater eventonan cu ta ser otorga na nan pa luna door di Ministro di Husticia y Deporte.

Pueblo, deportistanan y hubentud ta perde pa di tres biaha na momento cu empresarioonan a drenta den wegá.

Aki atrobe e empresarioonan no a pone placa pa construi e lugar mescos cu e "Brotherman" pero si a saca probecho economico riba custia di nos pueblo, nos deportistanan y nos hubentud.

Mi ta ilustra un ehempel.

E grupo UB 40 aparentemente lo a kibra tur record di asistencia den Aruba Entertainment Center.

E carchinan lo a ser bendi na \$ 40,00 y na dado momento a ser bisa cu lo tabata tin 9.000 persona den Aruba Entertainment Center.

Awor si nos multiplica 9.000 cu \$ 40,00 nos ta haya un total di \$ 360.000,00 x Afl. 1,77 = esaki ta bira Afl. 637.000,00 cu e promotor a ricibi.

Corda cu un promotor no ta paga pa e ticket aereo, ni e estadia di e grupo, debi cu e ta duna su sponseman publicidad pomada y e sponseman aki ta cubri e gastonan.

Ta solamente mester paga e "Brotherman" di e Ministro cierto percentage y Belasting 30% pues tog e empresario ta keda cu por lo menos un Afl. 300.000,00 despues di Belasting y Huurmento di e lugar di luz cu sonido.

Ken ta haya e ganashi aki?

Claro cu ta e empresario y no e pueblo di deportistanan ni nos hubentud.

Ki tempo bo a tende durante existencia di Aruba Entertainment Center cu e "Brotherman" aki como operador of un di e empresarioonan a duna x % na deporte of pa hubentud?

Bo a rey bon; NUNCA !!

Awor mi a duna un solo ehempel di UB 40 pero no lubida e conciertonan di; Inner Circle, Juan Gabriel, Carlos Vives, Chaka Demus + Pliers, Kassav', Burning Spear, Proyecto Uno, X-Mas on Ice, Muai Thai Kickboxing. (A caso esakinan ta parti di nos cultura)

Laga nos calcula na tur e actividadnan aki a bay minimo 6.000 persona y a cobra \$ 35,00 x 1,77 pa yega na un total di 3.7 Miyon Florin cu e empresarioonan "Brotherman" compania di sonido y luz lo a gana.

Atrobe pueblo, deportistanan y hubentud a perde.

Kiermen cu Fundacion Lotto pa Deporte a perde di gana y perde pa yuda deporte y alavez hubentud.

Un otro aspecto ta e hecho cu diripiente un comision Pro Aruba Entertainment Center a lanta pa tene e lugar habri.

Pa ki motibo?

Pueblo no ta kere cu ta pa interes materialista?

Ken ta tras di henter e asunto aki?

Entre otro tin empresario, doño di compania di luz y sonido, musico.

Unda e interes na nos cultura, nos hubentud y deporte a keda?

No lubida kendenan tabata Ministro di Deporte pa e ultimo cinco aña.

Dos ruman y famianan tabata consehero, pues henter e asunto aki a keda den un grupito y ta mas cu logico cu nan no kier perde esaki ya cu tur gasto a cay riba lomba di pueblo, deportistanan y hubentud tog.

Esaki ta e realidad y pa di cuater biaha pueblo, deportistanan y hubentud ta perde.

Otro punto cu ta resalta ta e hecho cu ta e comision Pro Tranquilidad a protesta y Huez a duna nan razon cu a keda prueba cu tabata tin violacion di sonido en exceso.

Aki Fundacion Lotto pa Deporte mester a paga, manera mi tin entendi mas di 100 mil Florin debi cu na tres ocasion durante Jazz Festival a viola e sonido y na cuater ocasion e grupo UB 40 cu a pasa mas di 832 biaha e limite.

Ningun empresario a duna ningun cent pa yuda cubri gasto.

Mi ta di opinion cu e Comision Pro Aruba Entertainment Center ta laat debi cu ora cu Huez a dicta sentencia cualkier ciudadano tin e derecho democratico y tabata tin e oportunidad pa reaccion den 14 dia cu ta stipula den ley.

Mi no por kita e derecho cu cada grupo, organizacion o ciudadano tin pa protesta, cual derecho ta ancla den nos Constitucion.

Pero no ta asina si cu mester hunga politica, ni instiga pueblo cual ta e caso aki y mi ta ilustra.

Ken a inicia cu henter e asunto aki?

Un politico cu a duna su "Brotherman" e lugar pa opera.

Tempo cu nan a tuma e decision pa traha Entertainment Center e ora eynan mester a cambia statutonnan (Esey ta mal conseho na e Ministro).

Actualmente Aruba Entertainment Center ta traha contra statutonnan di Fundacion Lotto pa Deporte.

Ki ehempel esaki ta pa nos hubentud y deportistanan?

Ki dia un acto cultural netamente di Aruba a ser teni den Aruba Entertainment Center y a hala 5.000 hende o mas?

Tene evento cultural

manera dera gai, obra di teatro, actividad carnavalesco, Dande etc no ta cubri gastonan pa mantencion.

Pesey tin Cas di Cultura cu 500 asiento y mayoria di biaha e no ta ni yena completo; lamentablemente.

Otro aspecto ta cu e comision ta fomenta desunion di rasa.

Ministro ta ser yama pa Yiu di Curacao, pero mama Arubiano y pa tur e añanan cu el a fungi como docter di cas, si e no a ser cataloga como tal.

Mi ta menciona algun Arubiano den bon puesto na p.e. Curacao:

Sr. de Kort, doño di Banco di Caribe;

Sr. Leo, ruman di Daniel Leo (q.e.p.d.) tin su Offshore Business;

Actual Ministro Dijkhoff;

Actual Secretario General di Gobierno di Curacao drs. Harold Arends;

Sr. Cerilo Koolman, hefe di Catering Afd. ALM / KLM;

Un tal Sr. Ruiz, hefe halto di casino.

Pues nos no ta scoge unda cu nos kier nace pero si nos por contribui na unda nos ta gana nos pan di cada dia.

Laga nos kita for di bista cu henter e asunto ta algo politico y instigacion y mas ainda beneficio financiero pa e grupito aki cu ta bringa pa tene Aruba Entertainment Center habri.

Mi tin entendi cu nos deportistanan a dicidi di lanta para y exige pa habri e lugar aki cu ta propiedad di Fundacion Lotto pa Deporte pero pa deporte y tin un accion di firma ta andando pero pa deporte.

Ohala pueblo sostiene e accion aki cu sigur sigur ta na su lugar y na favor di deporte.

Mi proposicion ta pa tur e promotorman cu awé ta grita pa habri Aruba Entertainment Center duna un parti di nan ganashi pa nan traha nan propio Entertainment Center.

Un Ciudadano.
(Number y adres
conoci pa Redaccion).



BON PAN
PANADERIA
TIN FRESKO TUR DIA:
PAN, BOLO
PASTRY Y SNACKS
Turibana 1, Noord
5 min for di playa
Tel: 61551



BOC GASES
Balashi Tel: 52173
Annaunces that: effective today all cylinders left at our plant for refilling or testing, sins or before December '95 need to be pick-up within 30 days. After this period we are not responsible for the cylinders, and we will charge Afl. 5,= per month per cylinder, as custody.